

Frumvarp til laga

um breytingu á lögum nr. 55/1991, um þingsköp Alþingis.

Flm.: Valgerður Bjarnadóttir, Siv Friðleifsdóttir, Árni Þór Sigurðsson, Björgvin G. Sigurðsson, Björn Valur Gíslason, Eygló Harðardóttir, Helgi Hjörvar, Jónína Rós Guðmundsdóttir, Magnús Orri Schram, Mörður Árnason, Róbert Marshall, Sigmundur Ernir Rúnarsson, Sigríður Ingibjörg Ingadóttir, Skúli Helgason, Þór Saari, Þráinn Bertelsson.

1. gr.

Á eftir 2. mgr. 53. gr. laganna kemur ný málsgrein, svohljóðandi:

Þingmaður getur, meðan hann gegnir ráðherraembætti, ákveðið að sitja á Alþingi einungis samkvæmt embættisstöðu sinni sem ráðherra, sbr. 51. gr. stjórnarskrárinnar, og tekur vara-
maður hans þá sæti á Alþingi. Tilkynnir ráðherra forseta ákvörðun sína með bréfi sem forseti
kynnir þinginu. Varaþingmaður, sem tekur sæti á Alþingi samkvæmt þessari málsgrein, nýtur
allra sömu réttinda meðan hann situr á Alþingi eins og þeir alþingismenn sem eiga þar fast
sæti. Varaþingmaðurinn hverfur af þingi þegar kjörtímabilið rennur út eða áður við þingrof
eða þegar ráðherranum hefur verið veitt lausn frá embætti.

2. gr.

Lög þessi öðlast þegar gildi.

Greinargerð.

Með frumvarpi þessu er ráðherra sem jafnframt er kjörinn alþingismaður gert kleift, ef
hann telur ástæðu til, að ákveða að varamaður hans taki sæti á Alþingi meðan hann gegnir
ráðherraembætti en að hann sitji á þingi einungis í krafti embættisstöðu sinnar skv. 51. gr.
stjórnarskrárinnar. Nýti hann sér þennan möguleika yrði honum heimilt að taka þátt í um-
ræðum á Alþingi en ætti ekki atkvæðisrétt. Varamaður hans hefði hins vegar öll réttindi al-
þingismanns og bæri sömu skyldur. Hann væri m.a. kjörgengur í nefndir Alþingis eins og
aðalmaður ólíkt varaþingmönnum sem taka sæti í forföllum aðalmanns, sbr. 2. mgr. 17. gr.
þingskapa.

Í 2. gr. stjórnarskrárinnar er kveðið á um þrískiptingu valdsins í löggjafarvald, fram-
kvæmdarvald og dómvald. Skilin á milli löggjafarvaldsins og framkvæmdarvaldsins eru hins
vegar óljós þar sem þingmenn, sem taka við ráðherraembætti, halda áfram þingmennsku og
atkvæðisrétti sínum á þingi jafnvel þó þeir eigi yfirleitt ekki sæti í þingnefndum.

Flutt hefur verið frumvarp um breytingu á stjórnarskrá þess efnis að skýrt verði kveðið á
um að þingmaður sem skipaður verði ráðherra skuli víkja úr þingsæti á meðan hann gegnir
ráðherraembætti og varamaður hans taka sæti hans á meðan. Verði það frumvarp samþykkt
getur breytingin eðli máls samkvæmt ekki tekið gildi fyrr en á nýju kjörtímabili. Það frum-

varp sem nú er lagt fram gerir þeim sem svo kjósa kleift að hafa þennan háttinn á strax á þessu kjörtímabili.

Það er álit flutningsmanna að skýrari aðskilnaður löggjafarvaldsins og framkvæmdarvaldsins muni styðja við vandaðri vinnubrögð við löggjafarstörfin. Þetta á ekki einungis við um störf framkvæmdarvaldsins sem er ábyrgt fyrir flestum frumvörpum sem lögð eru fram á Alþingi, heldur einnig um störf löggjafans. Frumkvæði þingmanna að lagasetningu yrði líklega meira við skýrari aðgreiningu frá framkvæmdarvaldinu.

Þó að ráðherra ákveði að varamaður taki sæti hans á Alþingi heldur hann sömu kjörum og aðrir ráðherrar, sbr. 5. gr. laga nr. 88/1995, um þingfararkaup alþingismanna og þingfararkostnað. Verði frumvarpið að lögum leiðir ákvörðun ráðherra um að varaþingmaður taki sæti hans á Alþingi því til aukinna útgjalda sem nemur þingfararkaupi og öðrum greiðslum til varaþingmannsins.